

乾
象
通
鑑

乾象通鑑卷第二十

河間府免解進士臣李

李奉

聖旨編

紫微垣外坐統論

天牀星論

華蓋星論

杠星附

傳舍星論

八穀星論

內階星論

文昌星論

三師星論

天年星論

勢星論

北斗星論

輔星附

相星論

太陽守星論

三公星論

天一星論

太一星論

內厨星論

天槍星論

玄戈星論

天棓星論

扶箱星論

天厨星論

鈎星論

天牀星論

天牀星統占

客星干犯天牀星

彗孛干犯天牀星

流星干犯天牀星

雲氣干犯天牀星

天牀星占

傳曰天牀六星在垣門外主寢舍解息燕休之所

陶隱居曰天牀傾天子失位亦曰人君有大憂

陳卓叙占曰天牀當闔闔門次主天子寢舍星正則

吉星明則天子有慶傾覆則人主不安多憂虞

河圖遺書曰天牀六星正吉欹凶色欲黃潤不喜有芒

角黃潤則天子有喜慶事芒角則天子有憂

陳卓叙占曰天牀星踈坼則天子不安宮庭星就聚

則天子無出宮防內變

河圖遺書曰天牀星暗則宮廷有大災亦曰宮中有

逆上謀

客星干犯天牀星

武密占曰客星入天牀宮有刺客一日左右侍臣當憂
耳德曰客星守天牀若守十日陰謀成事亦曰有叛
謀王者惡之

河圖遺書曰客星抵天牀則姦邪在君側亦曰有姦
臣逼君

陳卓叙占曰客星觸天牀則天子不安寢色黃赤則
有憂君蒼白則天子惡之

彗星干犯天牀星

武密曰彗孛干犯天牀天子憂大臣失位

巫咸曰彗孛干犯天牀主火入宮中連燒寢所一曰有刺客

陳卓叙占曰彗星本主天牀則天子出宮亦曰人君下殿

河圖遺書曰星孛天牀則天火災宮殿亦曰姦邪在禁流星干犯天牀星

武密曰流星干犯入天牀宮中不安后妃謀欲叛其主一云女主立

陳卓叙占曰流星入天牀則天子私出禁廷流星出天牀則進倡俳入後宮

河圖遺書曰流星抵觸天牀則光芒奄天牀不見則
有后妃干政

雲氣干犯天牀星

荊州占曰赤黃氣入天牀天子有美女喜若黃氣入
天牀後宮有子孫喜蒼白氣入天牀人君不安
青黑氣入天牀主憂疾白雲氣入天牀王者惡之
陳卓叙占曰有青氣繚繞天牀奄星滅者天子寵後
宮有白氣環繞天牀則天子自將兵有青黃氣覆
天牀則天子有喜事亦曰宮中有子孫喜

華蓋星論

杜星附

華蓋星統占

客星干犯華蓋星

彗孛干犯華蓋星

流星干犯華蓋星

雲氣干犯華蓋星

華蓋星統占

傳曰華蓋七星杠九星合十六星如蓋狀所以覆蔽
大帝之座也

陶隱居曰華蓋以蓋在帝座上也傾斜主凶

星讚曰華蓋章光掩翳帝樞杠主華蓋之柄也

陳卓叙占曰華蓋星踈圻則宗廟不安亦曰國棄祀
河圖書曰華蓋杠星就聚執法者有憂不然受刑華

蓋星覆及歌側則王室傾覆

一行游儀後論曰華蓋星俱亡則國祚大人當之

客星干犯華蓋星

武密曰客星入華蓋王室有憂兵起天子宫廟不祀客

星守華蓋執法臣有被黜者

陳卓叙占曰客星犯華蓋則天子起兵亦曰社稷有憂
河圖遺書曰客星守華蓋則天子不安宮殿亦曰天

子離宮

古今星釋星客星守華蓋有光芒色赤則王室有傾

覆之患亦曰社稷有虞

彗孛干犯華蓋星

武密曰彗孛干犯華蓋星可六七尺天下兵起國易政

近期二年遠期三年

陳卓叙占曰彗孛干犯華蓋及尋文則宮中有叛兵亦曰有內變

河圖遺書曰星孛華蓋則天子自將兵禁廷又曰衛士有叛謀

流星干犯華蓋星

武密曰流星干犯抵華蓋天子失宮闕以赦解之流星貫華蓋三公有坐罪者

巫咸曰流星犯華蓋則兵起宮中亦曰有內變

陳卓叙占曰流星干犯華則天子不安寢所流星貫華

蓋光芒奄星不見則姦細入宮亦曰有叛臣在

宮中

雲氣干犯華蓋星

武密曰黃白氣華蓋宮中天子有喜赤黃氣出華蓋天
子方鎮官皆受賜一日侯王受賜喜

陳卓叙占曰有黃氣入華蓋盤覆在上天子錫賜施下
有黑氣入華蓋則天子有憂

傳舍星論

傳舍星統占

客星干犯傳舍星

彗孛干犯傳舍星

流星干犯傳舍星

雲氣干犯傳舍星

傳舍星統論

傳曰傳舍九星在華蓋上主賓客館舍之事

陶隱居曰傳舍今之四方館也故星讚曰傳舍揖

焦延壽曰傳舍星入紫微垣間胡人來入漢館

陳卓叙占曰傳舍星踈圻則郵傳道路不通亦曰國有

憂虞

河圖遺書曰傳舍星就聚則姦臣有謀亦曰逆上人臣

傳舍亡一星道路塞九星俱亡則姦邪在君側亦曰厝

誅逼天子

客星干犯傳舍星

黃帝總占曰客星守傳舍則有姦使入國

雒書摘亡辟曰客星守傳舍邦有憂大使轉粟天下若

自河之東受劍戟之憂

陳卓叙占曰客星守傳舍色赤氣有光芒則夷狄侵境

掠民財

河圖遺書曰客星守傳舍色青黃有光芒乍東乍西則

豺狼滿道路亦曰盜賊四起

彗孛干犯傳舍星

武密曰若彗孛干犯守入傳舍突厥入中國侵境

陳卓叙占曰彗孛出傳舍夷狄起兵邊城陷亦曰邊塞失土

河圖遺書曰彗本出傳舍則盜賊侵奪州縣掠民財
流星干犯傳舍星

武密曰流星犯傳舍星則故兵大寇中國亦曰賊兵四起中國擾

陳卓叙占曰流星抵觸傳舍則狂寇殺人道路梗塞雲氣干犯傳舍星

武密曰黑氣入傳舍胡兵起中國擾

陳卓叙占曰黃氣入傳舍則有中使銜命宣布德意敷告天下亦曰有大赦黑氣入傳舍奄屋不見天下兵起夷狄侵陵中國

八穀星論

八穀星統占

客星干犯八穀星

彗星干犯八穀星

流星干犯八穀星

雲氣干犯八穀星

八穀星統占

武密曰八穀八星在華蓋西主候歲豐儉一主稱二主

黍三主大麥四主小麥五主大豆六主小豆七主
粟八主麻占曰其星明則八穀成實暗微則歲不
善若一星不見則一穀不登八星不見則穀大饑

客星干犯八穀星

石申曰客星入八穀天下穀大貴百姓飢野有餓莩
陳卓叙占曰客星守八穀有芒角則年穀不登亦曰五
穀不熟歲歉民飢

彗孛干犯八穀星

武密曰彗孛干犯八穀星則天下糴貴百姓流離散徙
道路化人如麻

陳卓叙占曰彗孛干犯八穀奄星不見則天下大旱野
無立苗百姓多餓死若星見則大水傷禾

京房外傳曰星孛八穀則國用匱乏軍儲不繼盜賊據
郡掠民財良民受禍

唐太祖大曆五年四月彗星行入八穀占曰主水潦穀
貴是年自四月霖雨至秋末方息京城大水
斗米千錢

流星干犯八穀星

陳卓叙占曰流星抵觸八穀星則光芒奄一星不見則
一穀不收奄五星不見則五穀不收八星凌奄不

見則天下大荒歉人無粒食野有餓夫

一行游儀後論曰流星抵觸八穀星光芒炷有聲如雷

則天廩有火災亦曰府庫空虛

雲氣干犯八穀星

武密曰黑氣入八穀天下萬物不收大荒歉也

陳卓叙占曰黃氣入八穀年穀豐百穀順成糴賤

內階星論

內階星統占

客星干犯內階星

彗星干犯內階星

流星干犯內階星

雲氣干犯內階星

內階星統占

傳曰內階六星在文昌北天皇之階也大象占曰階者
天皇升降之所也占明正為吉傾動有憂

天文別錄曰內階六星在文昌東北其西南星入井二
十六度天皇升降之所星明潤則朝廷治上下序
動搖則尊卑失次

井德占曰內階星為天皇升降之所星貴明而不欲暗
明則尊卑上下不失其序暗則朝廷不治一星
亡則百官失次三星亡則朝廷不治六星俱亡則
朝廷有內廢

陳卓叙占曰內階星坼則天下有兩朝廷亦曰有分裂之象

武密總占曰內階星不聯屬失舊處則朝官不正亦曰百官有憂

一行游儀後論曰內階就聚近文昌有大光芒則朝廷不睦百官有異謀亦曰人臣有陰謀

客星干犯內階星

天文別錄曰客星犯內階則外夷遣使入朝廷

天文總錄曰客星有光芒犯內階或乘或奄則夷狄內侵亦曰外夷因兵入覲

陳卓叙占曰外侮不禦內侵朝廷則內階傾敝有光角則夷狄內侵亦曰外夷入寇

彗星干犯內階星

武密曰彗字犯內階則宗廟有憂虞亦曰防內變

陳卓叙占曰彗星干犯內階星則百官有異謀朝綱不振臣不侵權

一行游儀後論曰彗字出內階則朝廷傾覆百官有憂亦曰朝廷有兵謀

流星干犯內階星

京房外傳曰流星干犯內階則臣下侵權亦由大臣

不受制于人君又曰臣逼君

陳卓叙占曰流星干犯內階光芒凌奄星不見則百官
爭權訐主亦曰朝廷尊卑失序

雲氣干犯內階

武密曰黃氣入內階則百官有喜出內階則百執事受
君恩賜

陳卓叙占曰黑氣入內階則臣下惡之亦曰朝臣有憂
餘色俱凶

文昌星論

文昌星統占

月暈文昌星

五星干犯文昌星 客星干犯文昌星

彗孛干犯文昌星 流星干犯文昌星

雲氣干犯文昌星

文昌星統占

傳曰文昌六星在北斗魁前天之六府也

雜書摘亡辟曰文昌主天府

春秋元命包曰文昌主集計天下事一日止將大將

軍建威武二曰次將尚書正左右三曰貴相大常

理文緒四曰司錄司中司隸賞功進士五曰司命

司怪主滅咎六曰司寇大理佐理寶所謂一者起

北斗魁前近內階者是也明潤大小齊天瑞臻

陶隱居曰文昌色光潤明則天下安萬物善若青黑微細則多所殘害若動搖移徙則三公黜不然則皇后有憂

石申曰文昌六星在紫微垣西其西北第一星入井三十度在赤道五十八度亦曰第一星在北斗魁前如狀天官斗戴箱六星曰文昌是也占曰色貴黃潤則萬民安大小均明則天瑞降青黑色微細則大臣有憂動搖移徙則百官受禍金火守之兵起
彗孛干之國多亂亡

陳卓叙占曰文昌星踈圻不相聯屬則大臣有離心離德百執事爭權亦曰人主失權

月暈文昌星

武密曰月暈文昌大赦期百日

陳卓叙占曰月暈文昌再重則大臣有憂三重至五重內赤黑外青白則臣下有叛謀亦曰臣逆君

古今星釋曰月暈文昌開暈口上有白氣貫之則人臣侵天子柄

五星干犯文昌星

武密曰歲守文昌天下兵起禮樂廢災惑守文昌兵

起將相凶鎮星守文昌天下寧

古今星釋曰太白守文昌第十一星則大將受誅亦曰有
野死大將太白守第二星則八座輔臣有憂守第
三星則貴相自將兵守四星則功罪不得其當
守第五星則太史有淫辭妄言妖惑朝廷守第六
星則刑罰不中執法者有憂

後梁末帝真明四年十二月癸亥鎮星犯文昌上將占
曰有大戰死是日北面招討使賀環率大軍與晉
人戰於胡柳陂晉人敗績大奔自相蹈籍死者不
可勝紀晉大將軍周德威歿於陣晉王復領軍

宋戰環軍遂敗翌日晉人攻濮陽陷之京師戒嚴

客星干犯文昌星

武密曰客星干犯文昌大臣謀叛

石申曰客星守文昌宮有兵君不安

陳卓叙占曰客星守文昌則有爲姦大臣亦曰下懷姦

客星守文昌色赤而有芒角則朝廷有姦臣欲

叛人主

彗星干犯文昌星

春秋緯合誠圖曰彗星出而拂文昌亂易政

武密曰彗星干犯文昌三公下獄大將謀叛

陳卓叙占曰彗孛出文昌則宰相受辱亦曰將軍受誅戮

一行游儀後論曰星孛文昌則大臣犯主亦曰大臣有震主之威又曰國易政

漢孝帝建安二十三年三月星孛于文昌晨見東方二十餘日夕出西方化文昌占曰除舊寘新之象

晉孝武太元十五年七月昌孛于文昌色白長十餘文占曰文昌為將相將相有憂至隆安元年王恭殷仲堪桓元等發兵表以誅王國寶為名朝廷順而殺之并斬其從第緒司馬道子由是失勢禍亂

成矢

隋陽帝大業十一年六月有星孛于文昌東南長五六寸色黑而銳夜動搖西北行數文昌五寸而滅占曰爲急兵八月突厥圍帝於鴈門帝從兵悉馮城禦寇矢墜帝前

流星干犯文昌星

黃帝曰流星出文昌貴相出兵亦曰貴臣自將兵

陶隱居曰流星出文昌光芒奄六星俱亡則大臣懷姦

化主流星抵文昌上將則貴相受辱

陳卓叙占曰流星歷文昌色白勾曲如文昌則大將

貴臣有野死者

1

一行游儀後論曰流星如大瓜起文昌抵觸他星則貴
臣受誅

漢成帝建始元年九月戊子有流星出文昌色白光燭
地長可四丈動搖如龍蛇占曰文昌爲上將貴相
是時帝舅王鳳爲上將舅子王商爲丞相鳳妬商
譖而罷之商自殺

後漢孝章建初六年七月丁酉夜有流星歷文昌餘氣
正白勾曲如文昌久而滅

後漢和帝永元二年四月丙辰有流星如大瓜起文昌

有頃聲如雷文昌為貴相是時竇憲為大將軍憲女弟婿郭舉為侍中射聲校尉鄧德母元俱出入宮中謀為不軌至四年事覺皆下獄憲弟篤景等自殺

漢靈帝熹平二年四月有星出文昌蛇行有首尾無身赤色有光照牆垣占曰文昌為上將貴相後六年司徒劉羣為中常侍曹節所譖下獄死

雲氣干犯文昌星

武密曰黃雲氣干犯文昌則百官進秩有黑氣犯文昌則大臣受辱亦曰人臣坐法

陳卓叙占曰有黑氣犯文昌則人臣坐法亦曰臣下有以失職坐罪者

三師星論

三師星統占

客星干犯三師星

彗孛三師星

流星干犯三師星

雲氣干犯三師星

三師星統占

傳曰三師三星主三公之位在北斗魁西主理七政宣德化和陰陽為模範占與三公分

陳卓叙占曰三師星主三公輔臣星明大有芒角則大

臣侵主柄星微小而色黃潤則吉

一行游儀後論曰三師三星星疎圻則三公失位星就聚則宰相有憂星移徙則大臣坐獄連家坐法一星亡則王者德意不施于下三皇俱亡則大臣受刑不然則黜

京房外傳曰三師星微明黃潤爲帝明大有怒角則爲失常星守帝則大臣布宣德化變理陰陽天下治安失常則大臣侵人君權亦曰君弱臣彊

客星干犯三師星

武密曰客星干犯三師星則三公失職色赤黃則宰

相受命出疆

陳卓叙占曰客星守三師則大臣不得君亦曰君臣情不通又曰臣下有離心離德

河圖遺書曰客星干犯三師有怒角則臣下遺主憂彗
孛干犯三師星

京房外傳曰彗孛干犯三師星光芒炸有炬火則三公
被黜亦曰三公有咎

海上通占曰彗孛干犯三師星則輔臣有獄死者亦曰
有野死大臣

古今星釋曰星孛三師則三公除位亦曰寵臣有誅

流星干犯三師星

武密曰流星入抵三師星則宰相出使不然有憂

海上通占曰流星入觸三師星則輔臣死曰三公當

之

雲氣干犯三師星

武密曰黃白氣入三師相有憂出三師則宰相病失位

不然死

河圖遺書曰黃氣繚繞三師星久而不散則三公受爵

祿亦曰宰相進秩

古今星釋曰黑氣入三師臣下爭推出三師星則輔

臣有匪謀

天牢星論

天牢星統占

月暈天牢星

五星干犯天牢星

客星干犯天牢星

彗星干犯天牢星

流星干犯天牢星

雲氣干犯天牢星

天牢星統占

傳曰天牢六星在北斗魁下主貴人之牢也

大象占曰其星主繩僇禁暴占與貫索同又曰天牢六星亦在中台北北斗東南亦曰貴人之牢

武密曰天牢六星主貴人之牢星俱見則獄繁星不見則務簡動搖則斧鉞用

古今星釋曰天牢星圻則有獄死大臣亦曰輔臣有訟河圖遺書曰天牢星就聚俱有怒角則貴臣受誅一星有光芒動搖則入臣繫獄六星俱有怒角色失常則天下有冤獄

海上通占曰天牢星常以五子夜候之一星不見小喜二星不見則賜爵祿三星不見則人主有德令故甲期八十日丙期七十日戊期六十日庚壬期五十日

月暈天牢星

武密曰月暈天牢則多盜賊一曰貴人有下獄

陳卓叙占曰月暈天牢再重則寵臣下獄亦曰大臣有陰謀不成

古今星釋曰月暈天牢三重及五七重內有白氣則宰相受刑

五星干犯天牢星

武密曰彗惑守天牢人民相食亦為國有敗兵太白歲星守天牢星國多枉法

陳卓叙占曰太白犯守天牢天下有冤獄貴臣受辱

一行游儀後論曰歲星守天牢天下獄繁亦曰有濫刑

客星干犯天牢星

武密曰客星干犯天牢三公下獄一曰將相薨

陳卓叙占曰客星干犯天牢則三公有叛謀繁獄連
家坐罪

一行游儀後論曰客星大如瓜色赤黃守天牢中則枉
法加責臣亦曰天下有冤獄

彗孛干犯天牢星

武密曰彗孛干犯天牢星則大臣犯法亦曰有暴死

輔臣

陳卓叙占曰星孛天牢中則宰相有斧鉞之誅亦曰
柄臣犯刑

古今星釋曰彗本在天牢中芒角指北斗魁則天子有
憂亦曰天子誅人臣

流星干犯天牢星

天文錄曰常以丑未日候流星入天牢者主有赦

陳卓叙占曰流星抵天牢執法者以枉法加大臣亦曰
有暴貴人臣受刑

古今星釋曰流星抵犯天牢星則執法者高下其手徇
情以枉刑加貴臣

雲氣干犯天牢星

荊州占曰有黑氣有圍長三四尺出天牢貴人及親屬有憂

陳卓叙占曰有黃氣覆天牢及縲繞刑法平囹圄空天下無濫刑

古今星釋曰有赤氣入天牢則兵變因濫刑加大將

勢星論

勢星統占

客星干犯勢星

彗孛干犯勢星

流星干犯勢星

雲氣干犯勢星

勢星統占

傳曰勢四星在太陽守西北主刑餘人用事

陶隱居曰勢星主助宣王命內常侍官也

大象占曰其星以不明為吉明則近臣强盛

陳卓叙占曰勢星不明則吉星明大及有怒角則官者

竊居權亦曰內侍爭權

客星干犯勢星

武密曰客星干犯勢星中官使有憂

河圖遺書曰客星守勢星中官有暴貴者亦曰內侍得

君擅權

陳卓叙占曰客星如大瓜來勢星不去去而復來留五
十日閹官受誅亦曰陰貴人失位

彗孛干犯勢星

陳卓叙占曰彗孛干犯勢星官臣竊政位以陰謀受誅
古今星釋曰彗本在勢星內官受辱亦曰陰貴人犯法
一行游儀後論曰星孛勢星則內侍竊主柄亦曰內侍
有陰謀逆上不成坐罪

流星干犯勢星

武密曰流星干犯勢星則刑餘人臣受賜一曰一內
侍起兵

陳卓叙占曰流星乘勢星則中官專政抵觸勢星則中官惡之

古今星釋曰流星犯勢星則貴臣惡之亦曰百官有憂雲氣干犯勢星

武密曰黃白氣入勢中官受賜赤氣入勢星中官謀叛黑氣入中官憂

陳卓叙占曰赤黃氣入勢星中則中官受寵有青白氣貫勢星則貴人犯罪坐流

河圖遺書曰有紫氣下覆勢星則內官有叛謀亦曰內侍逼君凌上

北斗星論 輔星附

北斗星統占

月入北斗星

月暈北斗星

歲星犯北斗星

熒惑犯北斗星

太白犯北斗星

鎮星犯北斗星

辰星犯北斗星

客星干犯北斗星

彗星干犯北斗星

流星干犯北斗星

雲氣干犯北斗星

北斗星統占

傳曰北斗七星在太微垣北七政之樞機陰陽之本元也故運乎天中而臨制四方以建四時而均五

行也魁四星璇璣杓三星爲玉衡又曰斗爲人君之象號令之主也又爲帝車取乎運動之義也又魁第一星曰天樞二曰璇三曰璣四曰權五曰衡六曰開陽七曰搖光一至四爲魁五至七爲杓樞爲天旋爲地璣爲人權爲時玉衡爲音開陽爲律搖光爲呂

石申曰第一星爲正星主陽德天子之象也二曰法星主陰刑女主之象也三曰令象主中禍四曰伐星主天理伐無道五曰殺星主中央助四旁殺有罪六曰危星主天星五穀七曰部星亦曰應星主

兵又曰一主天二主地三主火四主水五主土六
主木七主金又曰一主秦二主楚三主梁四主吳
五主趙六主燕七主齊

漢書曰玉衡者謂斗九星也第一星主徐州常以五
子日候之甲子爲東海丙子爲琅邪戊子爲彭城
庚子爲下邳壬子爲唐陵凡五郡第二星主益
州常以五亥日候之乙亥爲漢中丁亥爲永昌己
亥爲邑郡蜀郡祥柯辛亥爲廣陵癸亥爲捷凡七郡
第三星主冀州常以五戌日候之甲戌爲魏郡敎
海丙戌爲安平戊戌爲鉅鹿河間庚戌爲清河趙

國壬戌爲常山凡八郡第四星主荊州常以五卯
日候之乙卯爲南陽巳卯爲零陵辛卯爲桂陽癸
卯爲長沙丁卯爲五陵凡五郡第五星主兖州常
以五辰日候之甲辰爲東郡陳留丙辰爲濟北戊
辰爲山陽泰山庚辰爲濟陰壬辰爲東平任城凡
八郡第六星主揚州常以五巳日候之乙巳爲豫
章辛巳爲丹陽巳巳爲廬江丁巳爲吳郡會稽癸
巳爲九江凡六郡第七星爲豫州常以五午日候
之甲午爲潁州壬午爲梁國丙午爲汝南戊午爲
沛國庚午爲魯國凡五郡第八星主幽州常以五

寅日候之甲寅為芒莧丙寅為遼西漁陽庚寅為
上谷代郡壬寅為廣陵戊寅為涿郡凡七郡第九
星主并州常以五申日候之甲申為五原鴈門丙
申為朔方雲中戊申為西河庚申為太原定襄壬
申為上黨凡八郡

大象占曰星均明則國昌不明有咎若天子不恭宗
廟不欽鬼神魁第一星不明或變色若廣營宮室
妄鑿山陵則第二星不明或變色若不愛百姓妄
聚征伐則第三星不明或變色若發號施令不順
天道則第四星不明或變色若廢正樂務淫聲第

五星不明或變色若峻濫刑退賢傷正則第六星不明或變色若廣聚金寶不脩道德則第七星不明或變色

四時常色占曰春青黃夏赤黃秋白黃冬黑黃此是常明不如此者所向之國有兵殃起凡六十郡九州所領自不分而名焉又曰魁中四星為貴人之牢天理也輔星傳乎開陽所以佐斗成功也又曰主危正矯不平又曰丞相之象也七政明則其國昌不明國殃斗旁星欲多則安斗中少星則人恐上天下多訟法者無星二十日有輔星明而斗不

明臣彊主弱斗明主彊臣弱也若斗白暈及動搖則兵起其傍中心多小星則天下不安不然則國入散五曜及客星守入皆凶字彗尤甚也

陶隱居曰王者德至于天則斗拒齊明國昌物賤暗則國亡斗中小星少則正法不行

漢志曰杓攜龍角衡陰南斗魁枕參首

孟康曰杓斗杓也龍角東

方宿也攜連也衡斗之中央也殷中也

用昏連中者杓杓自華以西南

傳曰斗第七星法為太白金齊杓斗之尾也尾為

陰又其用昏昏陰位在西方故主西南

夜半建者衡衡殷中州河濟之間

假令杓昏建寅衡夜半亦建寅也

平旦建者魁魁海岱以東也

傳曰斗魁第一星法為曰斗秦魁斗之首首陽也又其用在明陽與明德在東方故主東北方

一行曰斗杓謂之外廷陽精之所布也斗魁謂之會府陽精之所復也杓以治之故鶉尾為南方負海之國魁以治故陬訾為中州四戰之國

月入北斗星

石申曰太陰入北斗天下大亂更王亦曰變革也

陳卓叙占曰月遂犯北斗則天下更正亦曰天子革命
古今星釋曰月犯北斗則天下大亂亦曰匿謀人臣篡
王位又曰天子失位

一行游儀後論曰月入北斗則有大喪亦曰有女主竊
天子柄

月暈北斗星

武密曰月暈北斗大國有喪民徙千里有拔城一曰
月暈連環及北斗天下喪有有拔城

陳卓叙占曰月暈北斗再重內黑外青赤或黃白則
有大兵喪亦曰不有死將必有屠城

古今星釋日月暈三重及五重則其國棄祀亦曰人君失位

魏文帝黃初四年十月內月暈北斗占曰有兵喪大赦天下七年五月文帝崩明帝即位大赦天下

後魏世宗景明元年十二月內月暈北斗時簡衍立少帝大赦改元尋又逼江州及金陵

晉廢帝太和四年閏二月月軍軫又有白暈貫月暈北斗柄三星占曰王者惡之六年伯溫廢帝

後魏閔帝普泰元年月在角連環暈北斗時事未兆及高歡屢逼少帝兵喪並起肆赦之令亦歲月躔焉

周天和五年正月乙巳月在氐暈有白虹長丈餘貫之
而有两珥連接規北斗第四星占曰兵大起大戰
將軍死於野是冬齊斛律明月寇邊於汾北築城
自筆谷至于龍門其明年正月詔齊公憲率師
禦之三月己酉憲自龍門度河攻拔其新築五城
起兵大戰之應也

歲星犯北斗星

海上通占曰歲星逆犯北斗則天下有大兵喪亦曰
死大將又曰國祚以兵亡

古今星釋曰歲星逆犯魁則人主有憂一曰國棄祀

一行游儀後論曰歲星不循軌失行犯北斗魁則外夷入境以兵侵陵中國及利先舉者

熒惑犯北斗星

河圖遺書曰熒惑犯北斗杓則人主失柄一曰人臣擅君權

京房外傳曰熒惑犯北斗則天下起兵一曰有急兵陳卓叙占曰熒惑入犯北斗魁則宰相以罪下獄一曰貴臣受辱

京房外傳曰熒惑犯北斗第三星則火災宮殿石氏曰第三星主火而又熒惑逆行犯第三星故天子所

處有水災

太白犯北斗星

古今星釋曰太白犯北斗則人主失柄亦曰有白衣會
一曰有兵喪

陳卓叙占曰太白犯北斗則天子離宮亦曰有貴人喪
一行游儀後論曰太白犯北斗第七星則天下兵起逆
犯失常色則破軍殺將

石申曰第七星主金亦主兵故太白犯守則有急兵

鎮星犯北斗

武密曰鎮星犯北斗則星則大臣有獄死者亦曰輔

臣受誅

陳卓叙占曰鎮星逆犯北斗第一星則天子有憂犯第二星則女主干政犯第三星則梁地有自立諸侯犯第四星則車騎滿野內外相侵伐犯第五星則趙分受禍犯第六星則倉庫匱乏五穀不登犯第七星則天下起兵齊分有寇賊

辰星犯北斗星

武密曰辰星犯北斗魁則王者惡之逆犯北斗杓星則天下大水傷禾稼

陳卓叙占曰辰星失行失色逆犯北斗則天子有疾

亦以王者有兵喪憂

一行游儀後論曰辰星犯守北斗則天子有憂刑罰濫
及貴臣亦曰枉法加良善

客星犯北斗星

考異郵曰旬始出於斗旁其怒蒼黑見則亂兵作諸侯
為害政害民

荊州占曰蓬星出于北斗中諸侯有奪地

韓陽曰有客星入北斗大臣諸侯有受兵者

邾萌曰有客星入北斗魁上下色青黃人主憂赤有大
客中國多兵黃白人主賀期皆六十日若百二

十日又曰客星出北斗下人主使諸侯色青黑言
憂死赤兵黃白言賀期皆六月若一歲又曰客星
居北斗旁有憂去北斗不滿尺者以月為期去尺
者期一年二尺期二年

荊州占曰客星入正星大人遇賊出政星為政者易出
北斗魁中天下赦星大赦大星小赦小皆期九十
日

武密曰客星干犯守北斗皆凶國當易主又曰將
相誅戮

晉惠帝元康六年六月景午夜有枉矢自斗魁東南

行察占曰以亂伐亂北斗主執殺出斗魁居中執殺者不直之象也是故趙王殺張裴廢賈后以理太子之寃因自篡盜以至屠滅以亂伐亂之應也隋大業三年四月丁未客星如桃大青白色入北斗魁中後出魁漸小凡見九十三日占曰天下兵起車騎滿野人主有憂又曰天下有亂兵大起臣謀主其七月乙酉衛王直在京師舉兵討擒之廢爲庶人至十月始州民王鞍權衆反討平之

隋煬帝大業十一年九月戊午有二枉矢出北斗魁委曲蜿蜒注於北斗占曰主以兵去天之所伐亦日以

亂伐亂執天者不正後二年宇文化及殺帝僭號
王世充亦於東都殺恭帝篡位

彗星干犯北斗星

郊前曰彗星入斗魁中出三日以上諸侯戮春夏期三
年秋冬期明年又曰彗入北斗魁中得名人其不
入魁失名人

武密曰彗孛干犯北斗有殺罰彗孛出北斗樞名人起
兵相伐天下亂易王

陳卓叙占曰彗本出北斗魁中其角炆孛北斗外則天
子以枉刑罹貴臣一曰以枉法殺無辜一曰天下

多刑獄

春秋文公十有四年秋七月有星孛于北斗傳曰有星孛入于北斗周内史叔服曰不出三年宋齊晉之君皆將死亂

後漢獻帝建安十一年正月星孛于北斗首在斗中尾貫紫宮及北辰彗星掃太微宮人主易位其後魏文帝受禪

晉惠帝永興二年十月丁丑有星孛入于北斗占曰玆璣更授天子出走又曰疆國發兵諸侯爭權是後諸王交兵明年惠帝崩

晉孝武太元十五年七月有星孛于北斗色白長十
餘丈占曰星入北斗諸侯戮一日掃北斗疆國發
兵諸侯爭權大人憂二十一年帝崩至隆安元年
王恭殷仲堪桓玄等並發兵表以誅王國寶為名
朝廷順而殺之并斬其弟緒司馬道子由是失勢
禍亂成矣

晉義熙十四年五月庚子有星孛于北斗魁中占曰
星孛入北斗帝空宮十四年劉裕還彭城受宋公
十二月安帝崩

唐僖宗光啓六年五月丙戌有星孛于尾箕歷北斗

占曰貴臣受誅

流星干犯北斗星

班固天文志曰流星犯北斗大臣有繫者

邾萌曰有流星抵北斗天下大發兵又曰大流星抵北

斗柄大臣有憂期六月

京房易傳曰有流星於北斗傍明如炬大長七尺如繒

布賊臣專制天下期三年

邾萌曰流星拂北斗東行不出其年臣有戮死者

荊州占曰有流星出北斗東行齊負兵出北斗南行

魏負兵出北斗西行秦鄭負兵出北斗北行楚鄭

負兵

郗明曰流星色黃白出北斗魁中有赦命

荊州占曰大流星入北斗魁中大臣有叛者又日出北斗魁中不出其年起兵又曰流星不入北斗魁中居其旁貴人有避害者

武密曰流星入北斗外國當有使進金王者一日三公有賜

漢成帝綏和元年正月辛未有流星從東南入北斗長數十丈二刻所息占曰大臣有繫者其年十一月庚子定陵侯淳于長坐執左道下獄死

後漢和帝永元十四年十一月丁丑有流星大如拳起
北斗魁中北至閣道猶有光色赤黃須臾西北雷

聲

古今注

後魏太武神麤四年九月丙寅有流星如太斗赤色出
太微流至北斗滅至延和三年閏月甲戌秦王赫
連昌叛走

隋大業十二年八月壬子有大流星如斗歷王良閣道
及北斗占曰主以兵去後二年宇文化及殺帝
僭號

唐高宗調露元年十一月戊寅流星入北斗魁中占曰為有外使

唐寶曆元年正月乙卯有流星長三丈出北斗樞星光

燭地入濁占曰有赦

雲氣干犯北斗星

荊州占曰五彩雲氣直入北斗天子立太子

郗明曰北斗有赤氣覆之兵大起氣多者兵大氣少者
兵少

京房易傳曰北斗旁有黑氣狀如禽鳥大如布席不出
三日必雨不然有虜人入塞

荊州占曰有赤雲入北斗則天子出令建四時黃雲氣
歷北斗則民有憂

司馬彪曰白氣冲北斗爲大戰

武密曰赤氣入北斗兵起及宮廟火災大旱又曰赤氣入北斗中環鉤不過一年有流血兵將死客勝主蒼白氣入北斗魁中大臣謀叛又曰蒼白氣入北斗多大風蒼白氣出北斗魁中其禍除黃雲蔽北斗明日雨黃雲壓北斗不過三日雨又曰青氣五日内必當大雨赤黃奄北斗明日大熱殺人蒼黑之氣入北斗魁中貴臣獄死黑氣入北斗化爲群鳥龍蛇豕形病疾人亡夷狄起

陳卓叙占曰蒼黃氣壓北斗魁積而不散則天下多枉
法亦曰執法者徇情曲法

漢熹平二年八月辛未有白氣如一匹練衝北斗第四
星占爲大戰明年冬揚州刺史臧旻冊陽太守陳
寅攻盜賊苴庚斬首千級

唐肅宗上元三年四月辛未赤氣貫北斗僕固懷恩叛
明年十月吐蕃陷長安代宗避狄幸陝州

北斗輔星論

北斗輔星統占

客星干犯輔星

彗星干犯輔星

流星干犯輔星

雲氣干犯輔星

北斗輔星統占

傳曰輔一星輔乎開陽所以佐斗成功丞相之象也七政星明則其國昌輔星明則臣彊

大象占曰輔一星附北斗杓第六星大臣之象也占欲其明而小吉若大而明則臣奪君政小而不明則臣任職明大與斗齊合國兵暴起暗而遠斗臣不死則奔若近臣專黨排賢用佞則輔生角近臣擅國符印將謀社稷則輔生翼

陶隱居曰輔星明則輔佐興而相若近一二寸爲臣

脅主

陳卓叙占曰輔星有怒角而色黃則臣竊主柄色青天
下饑百餓死色黑則水官受誅色白則大將野死
色赤則人臣迫君

一行游儀後論曰輔星小明而黃潤則輔臣受寵亦曰
場爵進秩星大明而有光芒則大侵國權一曰臣
下有叛謀將逆上

客星干犯輔星

荊州占曰客星入輔星色青相有憂若色赤將相起兵
色黃白將相有賜若有喜色黑相死

陳卓叙占曰客星大如挑色亦有芒角守輔星則宰相
侵朝政亦曰岡上迫君若王者有憂

一行游儀後論曰客星俱輔星則有暴貴人臣在天子
側色變則佞君唯色黃有喜

彗星干犯輔星

武密曰彗字流星干犯輔星皆爲將相受誅亦曰有死
輔臣一曰宰相惡之

陳卓叙占曰彗犯輔星則大臣以事坐法亦曰宰相失
位被遠竄逐

古今星釋曰彗星干犯輔星則弼臣有憂

流星干犯輔星

天文別錄曰流星干犯輔星則輔弼有出使者色變長
及丈餘則受命出疆者不達所之圖

陳卓叙占曰流星干犯輔星光奄星沒則弼諧無功幽
囚受辱亦曰有死臣

古今星釋曰流星干犯輔星則光及尋丈大臣出使以
兵死亦曰有路死輔臣

雲氣干犯輔星

邾萌曰黃白氣集輔星相有喜若進秩受賜予
荊州占曰有白氣侵輔星相有憂亦曰人臣惡之

武密曰黑氣集輔星將相有薨不則黜陟

天文別錄曰有黑黃氣盤覆于下移時不散者天子三

公受賜官爵亦曰輔臣進秩

陳卓叙占曰有黑氣在輔星上則人臣有憂亦曰臣下
失位

天理星論

天理星統占

客星干犯天理星

彗孛干犯天理星

流星干犯天理星

雲氣干犯天理星

天理星統星

傳曰天理四星在北斗魁中執法之官為貴人之牢占
明及其中有星皆合貴人下獄

陶隱居曰天理不明則人臣被執星小明而黃潤則獄
訟衰息囹圄空虛

陳卓叙占曰天理四星拆則貴臣死于獄中一星明大
則一貴臣下獄四星俱明各有光芒則貴臣死犯
法連以家坐

古今星釋曰天理四星就聚則貴臣有繫獄多冤枉天
理色變俱有芒角則天子多冤獄

客星干犯天理星

荊州占曰客星犯天理天下多獄廷尉亦坐之

陳卓叙占曰客星干犯天理星廷尉有暴進者一曰輔

臣有憂坐刑獄事

古今星釋曰客星犯天理星則天子惡之

彗孛干犯天理星

荊州占曰彗孛出天理大司空殺將相逐天子

武密曰彗孛干犯天理大臣以家事下獄有坐罪近期

八十日遠期百二十日

陳卓叙占曰彗孛出天理則刑法之官有憂亦曰廷尉

及坐法

流星干犯天理星

武密曰流星抵天理是則廷尉憂亦曰法官死

陳卓叙占曰流星出天理星則刑獄之官受命出使不

辱君命

古今星釋曰流星干犯天理執法者反坐亦曰法官死

雲氣干犯天理星

武密曰赤氣入天理中兵大起將相行亦曰天子起暴

兵一曰有急兵

陳卓叙占曰黑氣入天理星刑法官受誅

一行游儀後論曰有黃白氣壓天理星則天下有冤

獄亦曰有濫刑

相星論

相星統占

客星干犯相星

彗孛干犯相星

流星干犯相星

雲氣干犯相星

相星統占

傳曰相一星在北斗南相者總領百司而掌邦教以佐

帝王安邦國集相事

陶隱居曰相星主冢宰之位其占曰明即吉暗則凶亡

則相死不然則被黜

陳卓叙占曰相星小明而黃潤則宰相論道經邦天下
和懌星大明而有怒角則君臣不同道天下不理

古今星釋曰相星不明則宰相有憂相星亡則大臣死
客星干犯相星

陳卓叙占曰客星干犯相星輔相憂不出一年天下變
更其令民多遷徙

一行游儀後論曰客星犯相星則有暴貴輔臣亦曰天
子柄用小官

古今星釋曰客星犯相星凌奄不見則大臣爭權尊

卑失序

彗孛干犯相星

武密曰彗孛干犯相星則權臣受戮一日貴相當之一

曰幸臣有憂

陳卓叙占曰彗孛干犯相星若光芒及尋丈則人臣竊柄亦曰有逆謀犯主

一行游儀後論曰彗孛干犯相星則天下憂臣下有陰謀亦曰臣下謀上

流星干犯相星

武密曰流星干犯相星將相出不則三公薨

河圖遺書曰流星抵相星奄星亡則宰相以事坐法

一曰宰相受辱

海上通占曰流星出相星則輔臣出使亦曰輔臣起兵
雲氣干犯相星

武密曰黃白氣入相星諸侯有喜餘皆凶

陳卓叙占黑氣入相星則三公受辱黑氣壓相星不奄
則宰相有驚憂不成災

古今通占曰青白氣奄相星則大臣自將兵亦曰宰相
親戎服

太陽守星論

太陽守星統占 客星干犯太陽守星

彗孛干犯太陽守星 流星干犯太陽守星

雲氣干犯太陽守星

太陽守星統占

傳曰太陽守一星在北斗南相星西太將相之象也主
戒不虞設武備

河圖遺書曰太陽守明吉暗凶昴度氣平則大將相之
象昴度氣過上直北斗下覆紫宮則易政更王若
直衝不覆則有僭篡之憂衝北斗第一星主秦二
主楚三主梁四主吳五主趙六主燕七主齊八衝
輔星則人臣僭主位

大象占曰太陽守明則吉暗則凶移徙則大臣誅不爾則兵起

古今星釋曰太陽守一星明閏爲常暗則變色動搖爲變得常則吉遇變則凶若移入北斗魁中則大臣下獄一曰有受誅人臣若明大有怒角則大將有叛謀

客星干犯太陽守星

天文別錄曰客星干犯太陽守星則外夷有大將起兵侵掠境內

古今星釋曰客星出太陽守星則大將軍專斧鉞出師

一曰大將軍出異域

彗孛干犯太陽守星

武密曰彗孛干犯太陽守星則大將受辱亦曰貴相有

憂

陳卓叙占曰彗孛出太陽守星則天下有急兵亦曰宰相自將兵一曰暴兵起

流星干犯太陽守星

河圖遺書曰流星干犯太陽守星則貴臣當之一曰將

相有憂虞

天文別錄曰流星入抵太陽守則宰相被黜亦曰臣下

被逐

後魏宣武帝延昌元年三月流星起太陽守犯北斗紫微宮北辰至華蓋滅太陽守主弼丞相車大將相之位占曰天下大凶主宮室憂明正月世宗崩於是王室遂弱政在公弼

雲氣干犯太陽守星

武密曰黃氣入太陽守大臣受賜三公有喜蒼白氣入將軍戰死赤氣入宰相憂

陳卓叙占曰黑氣入太陽守大將不利行軍出師一曰有野死大將蒼白氣入太守則大兵起一曰有兵

心喪

三公星論

三公星統占

客星干犯三公星

彗孛干犯三公星

流星干犯三公星

雲氣干犯三公星

三公星統占

傳曰三公三星在北斗西主宣德化調七政和陰陽之官也

大象占曰三公三星在北斗杓柄東並為司徒大尉司之象主變調陰陽輔佐機務占以移徙為不吉

居常則安諸星犯守三公有咎

陶隱居曰三公三星若一星亡則天下大喪二星亡則天下大亂三星亡則天下更王

陳卓叙占曰三公星拆則執政有離心離德一曰君臣不同道

古今星釋曰三公星明潤則君臣一德上下同心星明大而有芒角則貴臣失位光浮而動搖者臣逼君之象

海上通占曰三公星俱亡則大臣死亦曰宰相三公惡之

客星干犯三公星

武密曰客星守三公者三公憂誅戮之事亦曰大臣有憂虞

陳卓叙占曰客星守三公則姦臣害宰相客星出三公則佞臣在位謀反忠良

彗孛干犯三公星

武密曰彗孛出入三公將相下獄又曰三公薨

陳卓叙占曰星孛三公則將相待罪以兵事坐法一日有死將

古今星釋曰彗孛出三公則大臣受戮一日宰相受禍

流星干犯三公星

武密曰流星抵觸三公則人君不納忠言一日大臣被黜

陳卓叙占曰流星出三公則三公有犯刑者不以職坐免

一行游儀後論曰流星出三公光芒長餘則有出鎮三公

陳卓叙占曰黃氣干犯三公則太尉司空司徒以職受賞有赤氣入三公則三公有出鎮者

一行游儀後論曰黑氣出三公則臣下有匿謀不

成一日大臣擅賞罰柄

天一星論

天一星統占

客星干犯天一星

彗孛干犯天一星

流星干犯天一星

天一星統占

傳曰天一星在紫微宮門右星南天帝之神也主
戰鬪知吉凶者也

陶隱居曰天一星明光則陰陽和萬物盛天子吉星亡
則天下大亂

陳卓叙占曰天一星明潤君臣和天下理星暗則天

下用兵車騎滿野

客星干犯天一星

荊州占曰客星入天一星五穀大貴天下有饑民

古今星釋曰客星犯天一色赤大旱色黑大水傷禾色
白則天下兵起色黃萬物各得其宜色則
青有兵喪

彗孛干犯天一星

黃帝占曰彗孛干犯天一星則宮門閉一日天子無出
武密曰彗孛干犯天一臣謀叛一日臣逼君之象

石申曰彗孛干犯天一有白衣會亦曰有大喪

陳卓叙占曰彗出天一則除舊實新一曰人主當之

流星干犯天一星

武密曰流星抵天一兵騎滿野人饑流亡

海中占曰流星在天一冬滂夏旱萬物不成較貴民疫

流星抵天一兵起大戰流血

古今星釋曰流星抵天一則百姓流離天下飢荒野有

餓莩縱橫如麻

雲氣干犯天一星

武密曰黃氣入天一君臣和萬物成朝多賢士天下

太平赤雲氣入天一賢士危黑氣入天一宰相黜

一曰受戮

河圖遺書曰黃氣出天一則君臣同道上下協謀天下
理有赤氣入天一則禁庭有驚懼事不成災黑
氣大凶舉事用兵不利

太一星論

太一星統占

客星干犯太一星

彗孛干犯太一星

流星干犯太一星

雲氣干犯太一星

太一星統占

傳曰太一一星在天一南亦相近天帝神也主使十

六神知風雨水旱兵革饑饉疾疫災害所在之國也
星讚曰天一太一主丞神也

陶隱居曰太一明星大吉星暗凶若太一離位有水旱
兼乘斗後九十日兵起

客星干犯太一星

武密曰客星守太一大兵起民流饑疫又曰大荒旱
陳卓叙占曰客星守太一大水兵起貴相薨

彗孛干犯太一星

武密曰彗孛干犯太一大臣薨

石申曰彗孛干犯太一三公薨不然則黜之

黃帝曰彗孛干犯太一兵喪民流亡

流星干犯太一星

武密曰流星干犯抵太一宰相下獄宰相黜

荊州占曰流星出太一皮官受黜

雲氣干犯太一星

武密曰黃白氣入太一百官受賜玉帛赤氣入太一早
兵革遍野蒼白氣入太一天下民多疾疫之災內

厨星論

內厨星統占

客星干犯內厨星

彗孛干犯內厨星 流星干犯內厨星

雲氣干犯內厨星

內厨星統占

傳曰內厨二星在垣西南門外主六宮之內飲食主后妃夫人與太子宴飲

陶隱居曰內厨女主傍側鄣宴之厨

陳卓叙占曰內厨星明則天子飲食宴樂得其時星暗及暗變色有怒角太官令有以失職受誅者

客星干犯內厨星

陳卓叙占曰客星干犯內厨星則天子以事減常膳一曰天子歡膳之憂

大象旁通曰客星入內厨守五十日不去者則姦謀有
進飲食之毒者色黃謀不成餘色皆凶

彗孛干犯內厨星

古今星釋曰彗孛干犯內厨星則天子以疾不進御膳
一行游儀後論曰彗孛干犯內厨則天子誤進食毒一
曰天子以飲食得疾

流星干犯內厨星

古今星釋曰流星干犯內厨則天子荒歉糴貴民饑
陳卓叙占曰流星犯內厨則歲饑民流離一日年穀不

登則流星觸內厨

雲氣干犯內厨星

天文別錄曰有黃氣入內厨則天子宴食飲樂適其宜
有赤氣入內厨則年凶民不粒食黑氣入內厨則
百姓有菜色

天槍星論

天槍星統占

客星干犯天槍星

彗孛干犯天槍星

流星干犯天槍星

雲氣干犯天槍星

天槍星統占

傳曰天槍三星一曰天鉞天之武備也在紫宮之左

右所以禦難也一曰北斗柄東三星曰天槍

石申曰天槍主鋒武備不虞

星讚曰天槍三星備非常也

黃帝占曰天槍星明大則斧鉞用星不明則兵敗

荊州占曰天槍芒角動搖則兵大起

武密曰天槍星暗徙則君失禦禁兵內變

陳卓叙占曰天槍星坼則不有敗軍必有死將一曰野

有死大將

客星干犯天槍星

天文別錄曰客星干犯天槍星則外國兵起入侵中國

色黃則中國勝色黑青白赤則中國敗外國彊

古今星釋曰客星犯天槍則斧鉞不備兵政隳壞

彗字干犯天槍星

天文別錄曰彗字干犯天槍星則天子有急兵一日兵起倉卒百姓受禍

陳卓叙曰彗字干犯天槍則天子自將兵一日兵起宮中又曰有內亂

流星干犯天槍星

天文別錄曰流星抵天槍星則車駕有虞禁兵有不測

變亂

陳卓叙占曰流星犯天槍星則兵革不戢楚丘切聚也天下

用武

雲氣干犯天槍星

武密曰赤雲氣入天槍御驚失位期二百日蒼白氣入

天槍兵起

古今星釋曰黑氣入天槍則衛士有匿謀一日禁兵欲
叛不成

玄戈星統論

玄戈星統占 月五星犯玄戈星

客星犯玄戈星 彗孛犯玄戈星

流星犯玄戈星 雲氣犯玄戈星

玄戈星統占

傳曰玄戈一星主胡兵占與梗河略類也

陳卓叙占曰玄戈星主北夷星小明則吉明大出怒角

大凶

石申曰玄戈星者天戈也角出而動則夷兵起

武密曰玄戈暗徙戎狄將退五星犯守則兵起滿野

陶隱居曰玄戈動則胡兵必有侵中國事

五星犯玄戈星

天文別錄曰月暈玄戈星則五日有雨無雨則胡兵起

起一日夷狄侵凌中國

陳卓叙召日月犯玄戈星則邊鄙有警一日夷狄起
兵入寇

河圖遺書曰歲星犯玄戈星則武備不謹外寇侵中
國災惑犯玄戈星則兵庫有火災太白犯玄戈星
則天下兵起辰星犯玄戈星則斧鉞加無辜亦曰
兵起鎮星守玄戈星有兵兵止無兵兵起

客星犯玄戈星

天文別錄曰客星犯玄戈星則車騎盈四野寇賊滿道
路一日兵不捨干戈

陳卓叙占曰客星犯玄戈星則兵車滿野干戈不釋手
一曰農夫執兵戈

彗孛犯玄戈星

古今星釋曰彗孛犯玄戈星則干戈滿目國多賊盜一
曰外寇掠民財

河圖遺書曰彗孛犯玄戈星則天下兵起一曰外夷
入寇

流星犯玄戈星

武密曰流星犯玄戈星則胡兵大起入侵中國亦曰
夷狄有兵起

陳卓叙占曰流星抵觸玄戈星則外侮不制侵掠
邊去一日胡兵入寇中國

雲氣犯玄戈星

武密曰黑氣入玄戈胡兵退境蒼白氣入玄戈胡人病
疫其所死者過半

陳卓叙占曰蒼黃氣入玄戈則胡兵勝一曰胡寇中
原大掠而歸有赤氣入玄戈則胡虜有大災有
白氣入玄戈中國舉兵伐夷狄

天棓星論

天棓星統占

客星干犯天棓星

彗孛干犯天棓星 流星干犯天棓星

雲氣干犯天棓星

天棓星統占

傳曰天棓五星天子先驅也主分爭與刑罰藏以禦雖
備非常也一星不具其國兵起

郝萌曰天棓星明則有憂微細則吉

石申曰天棓不歆明則斧鉞用一曰人臣受戮

陳卓叙占曰天棓五星在天林東北主天子先驅禦難

也星不歆明明則天子用斧鉞微明而黃潤則天

下偃武星圻則禁衛貴將有匿謀星就聚則其

國兵起一曰有內亂一星亡則衛兵爲亂三星亡則太兵爲亂五星俱亡天下大亂

客星干犯天棓星

焦廷壽曰有客星入天棓主大兵起

陳卓叙占曰客星入守天棓則外姦入寇國有兵變

一行游儀後論曰客星乘天棓則有大兵喪一曰有

白衣會

彗孛干犯天棓星

武密曰彗孛干犯天棓星國將有急難亦曰禁衛爲亂古今星釋曰彗孛干犯天棓星其國有兵災亦曰人君

因兵棄祀

京房外傳曰星孛干犯則百姓將亂一曰國祚將傾

流星干犯天棓星

陳卓叙占曰有流星入天棓諸侯多爭地者部分不均

平也

古今星釋曰流星抵犯天棓則有自立諸侯一曰天下用兵爭地亦曰有分裂之象

後漢孝和帝永元元年二月流星起天棓東北行三丈所滅色青白占曰流星起天棓爲兵其六月漢遣車騎將軍竇憲執金吾耿秉與度遼將軍鄧鴻

出朔方並進兵臨私渠北鞬海斬虜首萬餘級

雲氣干犯天棓星

荊州占曰蒼白氣入天棓有喪出天棓其禍除又曰入天棓兵起大將戮死一日起天棓兵起

邾萌曰黃白氣入天棓先驅有拜賜者出天棓先驅有被黜者

荊州占曰黑氣入天棓大人憂一曰天子失位

扶筭星論

扶筭星統占

客星干犯扶筭星

彗孛干犯扶筭星

流星干犯扶筭星

雲氣干化扶筭星

扶筭星統占

傳曰扶筭七星在紫微垣外天津北主盛桑之器亦主採桑勸蠶也

武密曰扶筭星明則吉暗則移徙絲帛貴不見則女功失業

陳卓叙占曰扶筭星明則天下布帛賤商賈通女功有絲枲為事

古今星釋曰扶筭星圻則天下女功廢扶筭星就聚失常則天下務奢侈女功尚工巧星芒及變色有

芒角乍東乍西則女功不脩布帛湧貴亦曰女主
無德不親蠶不勸女功

客星干犯扶筭星

武密曰客星干犯扶筭大如瓜色赤有芒角則天下女
女功廢桑蠶失時布帛貴

古今星釋曰客星干犯扶筭乘守不去留五十日則
天下多怨女

彗孛干犯扶筭星

陳卓叙占曰彗孛干犯出扶筭將作叛亦曰女主失勢
陳卓叙占曰彗孛芒角抵扶筭則后妃不德多妬忌

毒殺無辜美人

一行游儀後論曰星孛扶筭則淫風大行女功失時

桑蠶不收絲帛

音洗麻
有子也貴

流星干犯扶筭星

武密曰流星干犯扶筭星天下蠶不收絲綿大貴

古今星釋曰流星干犯扶筭則美人奪寵一日後宮

爭寵

天文別錄曰流星抵觸扶筭則桑貴蠶不收布帛價

高府庫空虛

雲氣干犯扶筭星

武密曰有黃氣出扶筭則文功務苟簡后妃不親蠶天
下物帛貴

陳卓叙占曰有黑氣出扶筭星則后妃失位新進美
人受寵一日後宮多妬忌害無辜

天厨星論

天厨星統占

客星干犯天厨星

彗孛干犯天厨星

流星干犯天厨星

雲氣干犯天厨星

天厨星統占

傳曰天厨六星在紫微垣外東北維主盛饌

陳卓叙占曰彗孛干犯天厨則國多餓等民多菜色
京房外傳曰星孛天厨則五穀不熟斗米萬錢民不
粒食

流星干犯天厨星

武密曰流厨干犯天厨大民饑流亡國棄祀

陳卓叙占曰流星抵天厨則天下之民遷徙流移一曰
父子不相保兄弟妻子離散

一行游儀後論曰流星犯天厨則國匱乏軍儲不繼百
官憂飲食天下饑荒起兵

雲氣干犯天厨星

武密曰有黃氣入天厨天下豐熟五穀賤狗彘食人食
有白雲氣入天厨則兵起爭食有黑雲入天厨天
下山荒民多菜色野有死夫

鈎星論

鈎星統占

客星干犯鈎星

彗孛干犯鈎星

流星干犯鈎星

雲氣干犯鈎星

鈎星統占

傳曰鈎星九星在傳舍東

星讚曰鈎星式道傳路輿也

荊州占曰鉤星非其政若星守之則地動又曰西河中

九星如鉤狀曰鉤星伸則地動

武密曰鉤星坼則道路梗塞鉤星俱亡則豺狼滿路

車騎盈野

河圖遺書曰鉤星直及他星守之則地為之震不然歲

饑人相食

客星干犯鉤星

武密曰客星犯鉤星色赤黃則其國有衣服之僭亦曰

衣服不遵國制

河圖遺書曰衣服僭上則客星犯鉤星客星守之百

日不出則其野地大震

彗孛干犯鉤星

天文別錄曰彗孛犯鉤星則地震為之裂圻毀屋
舍敕人民

河圖遺書曰星孛鉤星則地動敕人民亦日年穀
不登衣服之儻

流星干犯鉤星

海上通占曰流星犯鉤星異國有進御衣者光芒奄
鉤星不見外國諸侯衣天子服不然道路有
使至為人所戮

雲氣干犯鉤星

武密曰有黃雲氣干犯鉤星則衣服不貳道路及郵
傳無虞有黑氣入鉤星中則兵起亦曰車騎滿
道路青白赤氣俱主兵起